

東華續錄

乾隆九十一

臣王先謙敬編

臣周潤蕃恭校

乾隆三十四年己丑春正月丙戌免雲南官兵所過地方及永昌等三府州本年額賦其非經過地方免十分之五並免湖北湖南貴州三省官兵經過處所本年額賦十分之三○丁亥命署副都御史傅顯護軍統領烏三泰往雲南軍營監造兵船○戊子命河南光州等七州縣平糶○庚寅諭軍機大臣等緬匪乃巖崗蠻夷朕原無意取彼土地因近年輒敢越境騷擾邊氓始不得已派委兵弁辦理朕意緬匪本無知蠢愚無畏威悔罪傾心投誠尚可加恩曲宥撤兵停剿今及年餘緬匪雖曾投款並未遣其大頭人前來且書開多不恭順阿里亥阿桂去歲屢次遣兵毀其卡座擒其

活口並未深入其境痛加懲創是以特遣傅恆前往總理其事阿
里袞阿桂均係副將軍而阿桂任兼總督未免分心卽同阿里袞
辦事亦屬掣肘著卽去總督與阿里袞同心協助傅恆辦理進兵
事宜委軍機章京舒斌齎送副將軍印二顆前往伊等接受後惟
辦軍營事務再綠營兵甚屬無用除前調索倫兵二千名外再調
索倫吉林兵各一千名遣往著該副將軍等卽將所調湖廣等省
綠營兵多爲裁撤並將此際應備辦者妥爲備辦○辛卯諭據鄂
爾參奏臺灣總兵王鵬於賊匪黃教監禁焚殺一案措置乖張長
意退縮且心存諱飾屢次捏報儘將守備劉國棟揭參希圖卹罪
請旨革解質審等語王鵬前已降旨革職著卽革解來京交軍機
大臣嚴審定擬具奏守備劉國棟等有應行實訊之處並著鄂爾
達委妥員一併押解來京聽候審訊○賞吉林索倫兵所過地方

直隸河南湖北湖南貴州銀各十萬兩○以明德爲雲貴總督喀
甯阿爲雲南巡撫○壬辰諭軍機大臣等據阿里衮阿桂奏稱海
蘭察瑪格等帶領官兵馳赴南底壩侍衛官兵三百餘名馬匹俱
已疲乏因擇官兵馬匹較健者二百名率領擒捉設卡賊匪徑襲
憂鳩村莊將其三大村莊屋宇悉行焚毀官兵放箭截殺有中箭
死者有情急投江者有競渡登舟舟覆落水淹斃者約計不下千
名對岸雖有賊匪二千餘名設立壘寨但我兵太少又無船隻因
整旅而回等語我兵二百餘名勦戮賊匪千餘海蘭察等因人少
無船而回固合機宜然此不過賊匪展放之卡並未直偪賊境烏
足使其懾服至所稱行至南底壩馬匹俱已疲乏殊堪駭異彼處
之馬皆係發往餒養年餘且阿里衮等復係擇其壯者帶往何以
行走五六日卽形疲乏看來伊等不願進兵因故將馬力不及之

處稍帶聲敘以爲之地耳今甫行五六日卽至疲乏秋間進兵止行五六日而已乎彼時將復何以處之此事所關非輕阿里衮從前豈竟未嘗籌辦著傳諭阿里衮阿桂將馬匹何以疲乏若此或南方果係馬匹不宜或餒餒官兵辦理不善之處據實明白回奏如謂朕有旨申飭稍存掩飾致貽誤事體之後恐伊等不能當此重罪又據奏稱阿里衮於九月間親赴龍陵等處關隘指定設卡地方安設兵丁完畢十一月間官兵始陸續到齊等語朕遣伊等原爲勦賊並非令其防賊設卡等事皆須阿里衮親赴辦理是非勦賊特防賊之侵擾也阿里衮不識事體輕重徒勞跋涉以致耽延時日若然今秋策將安出進兵乎或防守地方乎彼能保賊匪不來乎此事伊等計算如何了結之處著據實奏聞○命發通倉米二十萬石補直隸霸州等十二州縣賑糶○丁酉命兩廣總

督李侍堯多購阿魏解送雲南軍營辟瘴○庚子諭大學士忠勇公傅恆前往雲南經略軍務今擇於二月二十一日起程所有應行事宜各衙門察例辦理○辛丑以官保署戶部尚書○裁甯夏滿城右翼副都統員缺○裁拉林副都統員缺歸阿勒楚喀副都統轄○癸卯諭吏部彙奏三年內各省甄別俸滿教職佐雜及隨時甄別各員一摺統覈數目雖多寡不等然皆尚有休致斥革之員惟雲南省及河東總河二處總計三年內休致僅各一員在雲南猶屬承辦兵差之時至河東佐雜額缺多至八九十員嵇璜在任已及年餘理應悉心激汰何至甄別竟無一人明係膜視察例姑容瞻徇嵇璜著交部嚴加議處○賜經略大學士公傅恆御用盛甲各一○丁未禁通州私立米局○戊申以刑部尚書官保協辦大學士○己酉諭軍機大臣等鄂甯奏臺匪情形一摺吳必東華續錄

達全不實力督辦甚屬非是吳必達帶兵渡海之初頗似勇往乃一至臺灣竟爾安坐郡城並不親往勦賊提督爲總統大員豈有不身歷行間親爲調度之理況前此因王魏種種貽誤是以令吳必達前往冀其能妥協經理今該提仍復憚於親身臨陣甯不有鑒於王魏覆轍耶且賊匪僅二三百人而前後所調官兵多至數十倍何難併力剋期勦捕乃遷延時日至今毫無措置是吳必達之不知緩急機宜已可槩見卽如摺內所稱劍門坑山徑陡絕僅容一人出入賊匪據險自守等語其地本非賊匪巢穴特因官兵追捕避匿其中斷不能盡糧糧食卽果路窄難行賊徒恃以負固豈能不出掠口食在內久聚縱官兵未能奮勇深入獨不能扼其要害使羣賊窘迫就縛乎若賊衆雖據此險別有閒道覓糧延抗又何難訪其路徑腹背夾攻賊雖狡黠又將何往乎且山徑卽屬

險峻並非人迹不到之所賊既能往官兵又何獨不能若賊衆出沒之處官兵竟不能追躡其蹤尙復成何營伍而營中又何必留此庸懦無能之人至於審理匪案交余文儀專辦吳必達實在統兵勦賊又豈可以在郡會審爲詞吳必達平時似覺明練乃辦此數百賊衆竟因循若此則其所謂曉事亦不過全工口給毫無實濟矣吳必達著傳旨申飭仍令將因何不行親勦及捕賊遲緩各緣由明白回奏吳必達既不督兵勦賊在彼亦屬無用轉恐掣掣相德之肘今予之一月之限若一月限內果能親身督獲正犯則聽其在臺督緝若自度不能不可久延吳必達著卽回伊本任候旨業相德尙知認真出力所有勦捕賊匪一事卽交其專辦會降旨令其帶領水師二千前往雲南此時爲期尙早著速籌備上繫統兵勦擒黃教等首夥各犯務期剋日竣事再行赴滇

派水師前諭葉相德就各營內挑選今伊回至內地尚須時日即著崔應階如數挑取熟練得力水師分派將弁陸續管領先行發往滇省葉相德隨後起程亦無不可崔應階審辦建甯案件要犯業已就獲亦可速爲審結即赴廈門駐紮以資調度鄧甯亦即回省城辦理諸事所有臺灣勦獲賊匪情形崔應階一得有該處稟報隨即迅速具奏將此並諭葉相德知之○壬子諭朕於二月朔六日舉行經筵衍聖公孔昭煥見在來京著令其隨班觀禮○癸丑諭據永瑞等奏南掌國王之弟召翁差遣土目賣東樂總進兵消息一摺所見固是而於辦理機宜尚未允協已於摺內批諭著翁既爲緬匪拘留五年今忽遣人探問消息其情形原屬可疑似伊所遣下人即詳加詰訊豈肯盡以真情吐露正無庸過事吹求惟應告以今年調集各路精兵合力進勦因前此取道本邦暢銷

一路未協地利今欲改由落卓來卡一路統合大兵前往如南掌
別有捷徑可通或較來卡等處爲便原可分兵一支令爾國之兵
隨同進發但爾國既志在報仇倚賴天朝聲勢爾國自當輸成效
力計官兵萬餘人及隨營馬匹雖所需日用芻糧自行運帶但既
經爾國地界一應糧餉草料爾等亦須豫爲儲備以資接濟雖官
兵斷不騷擾爾地而平價買取亦所必有傳諭之後不妨卽將所
遣二人發回不必再行羈留儻該國聞信後仍有回稟遲延辦理
永瑞等至秋間進兵時亦可由此路領兵數千率同南掌兵丁會
合進剿但須諸事留心防察不得稍爲所愚至於進貢一節直當
告以南掌素屬恭順屢經入貢如此時果欲進象卽當照往例具
表見在所投召翁之稟不便轉奏若另遣爾國大頭目齎奉表文
前來卽當代爲奏達如此方與事理允協將此傳諭永瑞五福並

諡阿里衮阿桂知之

二月甲寅朔重修太學 文廟成 御製碑文曰舉江淮河濟以

贊海吾知其不知海舉嵩岱恆華以贊地吾知其不知地然則舉道德仁義以贊 孔子者其亦類於是乎夫江淮河濟豈不爲海

所納而不足以形海之大然海固不拒江淮河濟以爲水也嵩岱恆華豈不爲地所載而不足以究地之厚然地固不讓嵩岱恆華以爲土也道德仁義豈不爲 孔子所垂而不足以盡 孔子之

量然 孔子固不外道德仁義以爲教也教之義始見於虞書而未有定所夏校殷序周庠學則三代共之是國學所昉乎夫三代既有學亦必有教而吾以爲 孔子立道德仁義之教者何蓋三代以前之教非 孔子不明三代以後之教非 孔子不立亦猶江淮河濟非海不納嵩岱恆華非土不載道德仁義非 孔子不

垂也國學始於元太祖置宣聖廟於燕京由元及明代有損益修葺至本廟而崇奉規模爲大備列聖右文臨雍必事輪奐乾隆戊午朕詣學展先詔易蓋黃瓦聿昭茂典然丹雘雖致飾壯觀而上棟下宇風雨燥溼歷任既久侵欹是虞爰以歲丁亥發帑二十餘萬特簡重臣司其事越己丑仲春告成工朕親釋奠以落成爲先是言臣有以乘此時修復辟雍闢水之制爲請者禮官以爲三代之制弗相沿襲實政不必泥古朕以其言良是遂從之門殿諸額一準會典皆親書各懸於其所舉大工者必泐碑以誌故敘其事書之若夫述孔子之言仍以頌孔子是猶繪日月星辰以象天朕有所不能○吏部議奏工部尙書嵇璜於前任河東總河任內膜視察吏應照徇庇例降調得旨嵇璜著降三級調用○以程景伊爲工部尙書

山吏部左侍郎遷

○丁巳釋奠

先師孔子○

己未 上御經筵○諭朕幾餘不自暇逸典學之下時及臨池最
昔輯石渠所藏前人墨蹟刻爲三希堂墨妙軒二帖廣示藝林復
念古帖流傳可補墨蹟所未備者惟宋淳化閣帖鐫集尤爲美富
遠出大觀太清樓諸本之上但惜初搨於賜者絕戡或云版尋殘
損當時已爲難得後來翻刻愈繁真意浸失有意追摹者未由津
逮內府舊藏淳化閣帖極多而畢士安所得賜本搨最精好茲特
敕選工鈎摹上石冀復舊觀第王著昧於辨別其所排類標題舛
陋滋甚不當聽其沿譌以誤後學因命于敏中等詳加考正以大
呈閱候朕鑒定分識各卷並命蒐採諸家釋文依字旁注其互異
者折衷附記於後以資省覽是於考文稽古之中兼寓舉墜訂謬
之益用嘉惠海內操觚之士焉○辛酉諭歸化城關務歸山西巡
撫轄○乙丑諭向來皇子等乘馬俱用金黃轡皇孫等俱用紫轡

近有因在大內養育與皇子等一體用金黃轡者微覺過分乃又有因分府居外遂用藍色者亦與體制不合宜酌定章程以示區別嗣後皇子等乘馬俱著用金黃轡皇孫等未經扶賞用金黃轡者俱著一體用紫轡皇曾孫元孫等亦著一體用紫色其鞍座各按轡色縣德縣恩俱係長孫著加恩仍賞用金黃轡永遠爲例著交上駟院內務府總管衙門存案遵行○諭馮鈐題參太和縣知縣郭世誼蕩檢不職該管之潁州府知府史魯璠縱庇劣員一疏已降旨將郭世誼史魯璠革職交該督確審究擬矣史魯璠身爲方面大員乃令族叔在所屬署中作幕是其上下通同逢迎挾制諸弊皆所不免此等惡風斷不可不嚴加儆治該撫馮鈐平日豈毫無聞見何竟不早爲查參直待史魯璠告病詳請解任以後始以勅參塞責外省徇庇屬員陋習每遇劣蹟彰著尙欲爲之設法

瓦全卽或知其事萬難掩覆不得已始以一挂彈章藉名整飭而其實不過隱售化大爲小化有爲無之術此種伎倆豈能施之朕前馮鈐近以湖南城工案內不將屬員通融情弊參劾蒙混題銷經部議以降調朕因馮鈐平日辦事尙屬認真特加恩曲貸仍予留任乃辦理此案有意取巧故於事後糾彈冀掩其前此袒庇之咎此而不加以嚴懲則督撫等益以膜視察吏爲得計誰復知所儆畏馮鈐著交部嚴加議處又諭馮鈐見在交部嚴加議處著解任聽候部議所有安徽巡撫員缺著富尼漢補授富尼漢未到任之前其巡撫印務著陳輝祖暫行護理

馮鈐著革職

○丙寅諭陣亡人

員陳雲龍劉義大完後仍賞給照騎尉世襲罔替不准過繼之子

承襲著爲例○以德承爲工部右侍郎

由內閣學士遷

○以朱珪爲山西

布政使調雷暢爲山西按察使以徐績爲山東按察使

由廣東遷

○

己巳以耀海爲盛京禮部侍郎

由奉天府尹遷

○壬申賜經略大學士

公傅恆及隨征將士等宴○癸酉轉何逢傳爲吏部左侍郎以羅

源漢爲吏部右侍郎

由倉場侍郎遷

○甲戌實授索琳戶部右侍郎○以

黃登賢爲倉場侍郎

由左副都御史遷

○辛巳命江蘇上年被水各州縣

平糶○壬午弛洋船帶硫磺入口禁

三月乙酉命伊犁將軍伊勒圖帶索倫兵往雲南軍營賞銀千兩

○丁亥上親耕藉田○戊子軍機大臣等議副將軍阿里袞等

辦理馬匹不善應革職得旨阿里袞阿桂明德著從寬各留本任

看其如何出力俟軍機告竣再降諭旨○己丑諭軍機大臣等昨

據臬卿奏會將黔省地方事務應否移交之處酌商新任督臣明

德履稱恭肅勤家與兼將軍者不同一切應照舊例辦理等語此

非明德欲急公辦事不過欲辦總督之事而卸軍務之責耳試思

軍儲要務與尋常軍費總督之事孰繁孰簡孰重孰輕正欲傳旨
申飭今日據明德奏到各摺則荒唐之處更多明德向來尙屬能
事何以近日頓不如前殊不可解已於摺內詳細批抹矣如所稱
軍需一切奏銷例應撫臣主彙等語其意竟欲以奏銷重務專賤
之於新任巡撫喀爾阿而彼直如置身局外試問明德由滇撫升
授總督屢降諭旨令其專心督辦軍儲自去年至今一切皆其經
手將來銷算軍需非彼之責而離責乃轉以不敢岐視爲詞豫爲
後日推卸地步是成何心明德向隨黃廷桂辦事豈竟懵然毫不
記憶黃廷桂當日承辦西陲軍務何等盡心伊竟全然不思效法
尙有何顏面見黃廷桂於地下乎又另摺內稱上年霜降後京兵
前赴沿邊防守其語更屬悖謬殊出情理之外去年調集京兵赴
滇原爲征勦緬匪之用因諸事尙須從長籌備是以暫停進勦並

非爲沿邊防守計且緬匪敢於抗拒天朝不可不整師勦滅以存國體實有難於中止之勢凡具人心者宜無不共知以我堂堂大清時當全盛集中國之力何事不可爲何憚此么磨緬賊而調八旗勁旅遠赴防邊乃明德竟覲顏作此等語恬不爲怪不但毫無羞恥卽天良亦漸滅殆盡矣至於馬匹一項尤爲軍行第一要務滇省見存馬匹餒殍已及一年前海蘭察等所騎之馬甫五六日卽已疲乏不堪是伊等全然不以爲事深可痛恨今尙加恩將伊等從寬留任以觀後效此時各省採辦解滇馬騾幾及五萬餘以資秋閒進剿之用伊等若尙知畏懼痛自悔悟卽上緊加意飼餵令其一律膘壯以利軍行或可稍贖前愆今閱明德所奏惟以派令提鎮大員督率經理便欲了其餒馬之責竟不議及如何實力籌畫親身董察不致虛糜貽誤如此重務僅責之數提鎮則朕委